



Selasa, 25 Januari 2022

Ogen: Kejadin 1:6-10



Guna Awang-awang



Tuuh nndahiken dahinna tuhu-tuhu dem perencanaan. Teptep tinepa erkawiten sada ras sidebanna. Kenca Dibata njaguis terang ersinalsal i babo doni, meriah kal ukurNa natapsa. E maka ipesirangna terang i bas gelap nari. Kenca si e wari pepagina iukuri Dibata maka perlu lit si nirangken lau ras lau sidebanna. I bas pengangkan kalak Israel kuño maka doni enda kibal ras idemi alu lau. E maka lau e arus ipesirang gelah lit teridah ruang-ruang i bas doni enda. Ipesirang Dibata lau e, i bahanna jadi sada ingan e me si igelari kita laut. Lit ka taneh si kerah si igelari daraten janah lit ruang kosong si igelari awang-awang.

Awang-awang e gunana nirangken lau ras lau sidebanna ras njaguisa gelah ula ersada. Awang-awang e igelari langit. I bas langit e me itamakan Dibata matawari bulan ras bintang-bintang. Melala ka nge jenis bintang si itamakan Dibata i je tapi labo ngasup matata e jine natapsa, labo terbeligai uga lalana. Awang-awang e pe jadi jarak si nirangken terang matawari seh ku permukaan bumi. Perbahan lit jarak e la melassa seh ku bumi, banci kita nggeluh ras tinepa si deban. Si e isikapken Dibata gelah perdalanan doni enda ratur. I bas awang-awang e angin erpiu-piu, erdeso-ku jah-ku je janah maba kiniulin man tinepa si deban.

Ngidah si ibahan Dibata e tuhu-tuhu kal alu pengukuri si mbages, seh maka la teridah lit kesalahen ras sikurang. Labo kal kita ngasup ngukurisa cara Dibata e nepa, saja si mehulina enggo ibahanNa. Selaku kita anak-anakNa, perlu ngumban cara si ibahan Dibata e, ngukuri si mehulina nandangi tinepaNa ras dalanken kai si enggo iukuri ras irancangNa. Dahinta e me mpekena-kena awang-awang enda gelah ola min sempat ceda, ula min imelketi udara kotor, ula min iklim e melas erkiteken ulahta.

